



## Iman – opskrba srca i izvor sreće (Meka)

Hatib: dr. Abdullah ibn Avad el-Džuheni

16. džumadel-ula 1447. po Hidžri / 7. novembar 2025.

Hvala pripada Allahu. Njega hvalimo, od Njega pomoć i oprost tražimo, i Njemu se kajemo. Utječemo se Allahu od zla naših duša i naših loših djela. Koga Allah uputi, niko ga u zabludu ne može odvesti, a koga On ostavi u zabludi – niko ga ne može uputiti. Svjedočim da nema drugog boga osim Allaha, Jedinog, koji druga nema. I svjedočim da je Muhammed Njegov rob i Njegov Poslanik.

“O vjernici, bojte se Allaha onako kako se treba bojati i umirite samo kao muslimani!”  
(Ali Imran, 102)

“O ljudi, bojte se Gospodara svoga, Koji vas od jednog čovjeka stvara, a od njega je i drugu njegovu stvorio, i od njih dvoje mnoge muškarce i žene rasijao. I Allaha se bojte – s imenom Čijim jedni druge molite – i rodbinske veze ne kidajte, jer Allah, zaista, stalno nad vama bdi.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio.” (El-Ahzab, 70–71)

Savjetujem sebi i vama, i svima koji slušaju moje riječi, da se bojite Allaha, Uzvišenog, Onoga Koji je stvorio robove, Njemu se svi vraćaju, od Njega je svako uputstvo i uspjeh. Bogobožnost je zaštita i najuzvišenija opskrba. Bojte se Allahove kazne i budite uz džemat, ne dijelite se u skupine. Najrazboritiji među ljudima je onaj koji preispituje svoju dušu i radi za ono što dolazi poslije smrti, te iz Allahove svjetlosti uzima svjetlo za tamu kabura. Neka se boji rob da ga Allah ne proživi slijepog, a na dunjaluku je vidio. Znajte, kome je Allah zaštitnik, taj se ničega ne boji; a protiv koga je Allah – ko mu može pomoći?





O skupino vjernika! Zaista je jedna od najvećih Allahovih blagodati prema Njegovim stvorenjima to što ih je uputio i upravio k imanu u Njega, i time ih posebno počastio. Uzvišeni kaže:

“Oni ti prebacuju što su primili islam. Reci: ‘Ne prebacujte mi što ste islam primili; naprotiv, Allah je vama milost podario time što vas je u pravu vjeru uputio, ako iskreno govorite.’” (El-Hudžurat, 17)

Iman u Allaha Uzvišenog znači: čvrsto uvjerenje i odlučno potvrđivanje da je Allah, Uzvišeni, Gospodar svega što postoji, da je Stvoritelj, Vladar i Onaj Koji svime upravlja, da samo On ima pravo da bude obožavan svakom vrstom ibadeta, od kojih su: namaz, post, dova, nada, strah, poniznost i pokornost.

Allah je opisan svojstvima savršenstva, i uzvišen je iznad svakog nedostatka.

Znajte, Allah vam se smilovao, da iman nije isprazna formulacija i pusta želja, nego ono što se ukorijeni u srcu i potvrdi djelima. Iman je izgovaranje jezikom, uvjerenje srcem i djelo udova i organa. Povećava se pokornošću, a umanjuje grijehom.

Iman je Allahov dar i velika, uzvišena blagodat u životu muslimana: blagodat koja čisti životni vijek, donosi bereket u životu, osigurava ahiret, i onoga ko ga nosi uzdiže i na dunjaluku i na ahiretu, jer u imanu je istinski život i ahiretska sreća.

Ovu blagodat poznaje samo onaj ko osjeti njezinu slast; i osjeća je samo onaj ko je živi.

To je svjetlo koje upućuje i osvjetljava put, svjetlo koje Allah, Uzvišeni, poklanja kome hoće od robova Svojih, a uskraćuje kome hoće. Uzvišeni kaže: “Reci: “Allah ostavlja u zabludi onoga koga On hoće, a k Sebi upućuje onoga ko Mu se pokajnički obraća.” (Er-Ra’d, 27)

A Poslanik, sallallahu alejhi ve sellem, rekao je: “Osjetio je slast imana onaj ko je zadovoljan Allahom kao gospodarom, islamom kao vjerom i Muhammedom kao poslanikom.” (Muslim)





Istinski, iskreni, Allahu posvećeni iman jeste temelj svakog dobra, izvor časti, izvor dostojanstva, ugleda i vođstva. Onaj ko ga posjeduje živi dostojanstveno, sretno, snažno i postojano na putu istine. Allah, Silni i Uzvišeni, onima koji vjeruju i koji su Mu pokorni obećao je da će im dati pobjedu i vlast na Zemlji. Uzvišeni Allah kaže: “To je objašnjenje svima ljudima i putokaz i pouka onima koji se Allaha boje. I ne gubite hrabrost i ne žalostite se; vi ćete pobijediti ako budete pravi vjernici. Ako vi dopadate rana, i drugi rana dopadaju. A u ovim danima Mi dajemo pobjedu sad jednima, a sad drugima, da bi Allah ukazao na one koji vjeruju i odabrao neke od vas kao šehide – a Allah ne voli nevjernike – i da bi vjernike očistio, a nevjernike uništio.” (Ali Imran, 138–141)

Vjernici se raduju Allahovoj zaštiti i bliskosti. Oni uživaju u lijepom životu; Allah ih voli, i vjernici ih vole. Allah ih brani i njih čekaju radosne vijesti i na dunjaluku i na ahiretu.

Njihova najveća utjeha u trenucima iskušenja i nedaća upravo je iman. Uzvišeni kaže: “Nikakva se nevolja bez Allahove volje ne dogodi, a On će srce onoga koji u Allaha vjeruje uputiti – Allah sve dobro zna.” (Et-Tegabun, 11)

Allah je vjericima podario iman i unutrašnji smiraj; u dobru i u nedaći, u pokornosti i u grijehu, u lahkoći ili teškoći, oni se svom imanu vraćaju pronalazeći u njemu snagu.

Savjeti i opomene njima su korisni, jer ih je Allah učinio Sebi bliskima. Njihov iman čuva ih od razvrata, svjetlom imana razlikuju istinu od neistine, uputu od zablude, novotariju od sunneta.

Časni su i dostojanstveni ljudi, kojima je Allah obećao pobjedu i vlast. Uzvišeni kaže: “...a dužnost Nam je bila vjernike pomoći.” (Er-Rum, 47)

Za njih mole meleki koji nose Arš Milostivog. Allah ih, zbog njihovog imana, upućuje na pravi put. Allah im obećava sigurnost i sreću i na dunjaluku i na ahiretu, i obećava im trajne blagodati na onom svijetu. Uzvišeni kaže: “Onima koji govore: ‘Gospodar naš je Allah’ – pa poslije ostanu pri tome – dolaze meleki: ‘Ne bojte se i ne žalostite se, i radujte se Džennetu koji vam je obećan. Mi smo zaštitnici vaši u životu na ovome





svijetu, a i na onome; u njemu ćete imati sve ono što duše vaše zažele, i što god zatražite – imat ćete, bit ćete počašćeni od Onoga Koji prašta i Koji je milostiv.” (Fussilet, 30–32)

Allahovom mudročću određeno je da ovaj ummet bude najbolji narod koji se ikada pojavio među ljudima, ummet koji poziva da se čini dobro, odvraća od zla i vjeruju u Allaha.

Uzvišeni je podstakao vjernike da čine dobra djela, rekavši: “O poslanici, dozvoljenim i lijepim jelima se hranite i dobra djela činite, jer Ja dobro znam što vi radite!” (El-Mu’minun, 51)

Iman u Allaha, Uzvišenog, i dobra djela, lijek su duše i hrana srca. Kada se ova dva dragocjena dobra ugnijezde u srcu, vlasniku tog srca svako dobro donose i na dunjaluku i na ahiretu.

Iman i dobra djela su spasilački pojas kojim se rob štiti od valova strasti, sumnji i teških smutnji. I, lijek su srcima, pa ako čovjek zanemari ovaj lijek, predajući se prolaznim dunjalučkim užicima, njegov život postane tegoban, a srce mu oboli.

I, doista, vidimo mnoštvo pritužbi, briga, tuge, nervoze i nemira u životima ljudi, što je posljedica udaljavanja od imana u Allaha i okretanja od Njegove vjere i Njegova zakona. Uzvišeni kaže: “Onome ko čini dobro, bio muškarac ili žena, a vjernik je, Mi ćemo dati da proživi lijep život i doista ćemo ih nagraditi boljom nagradom nego što su zaslužili.” (En-Nahl, 97)

Iman u vjerničkom srcu čini da bude potpuno zadovoljan svakim stanjem koje mu je Allah odredio. A, taj osjećaj srca zadovoljnog svojim Stvoriteljem, prvi je uzrok unutrašnjeg mira, a unutrašnji mir je suština sreće. Jer, kada je čovjek zadovoljan sobom i onim što mu je Allah odredio, tada se osjeća spokojnim u pogledu svoje sadašnjosti i svega onoga što trenutno prolazi; a kada je uvjeren u ahiret i pravednu nagradu, tada je spokojan u pogledu svoje budućnosti.

To znači da vjernik ne tuguje za prošlošću, ne živi sadašnjost nezadovoljan, niti dočekuje budućnost u strahu – u njegovoj vjeri postoje sredstva koja mu pomažu da





postojano izdrži životne borbe i da se suoči sa svim nevoljama, bolovima i iskušenjima koja mu život donosi.

Dobro povedi računa i nipošto ne dozvoli da ti iz srca nestane zadovoljstvo Allahom, ni za treptaj oka, jer time gubiš Njegovo zadovoljstvo tobom.

U povezanosti sa Allahom nalazi se snaga duše, zadovoljstvo i smiraj srca. Uzvišeni kaže: “O vjernici, tražite sebi pomoći u strpljivosti i obavljanju molitve! Allah je doista na strani strpljivih.” (El-Bekara, 153)

Poslanik, sallallahu alejhi ve sellem, kada bi ga zadesila neka briga, odmah bi tražio olakšanje kroz namaz. A njegov namaz nije bio formalno izvršavanje radnji; njegov namaz bio je potpuno predavanje razgovoru s Allahom. Kada bi nastupilo vrijeme namaza, on bi rekao Bilalu, radijallahu anhu: “Odmori nas njime, o Bilale!” – misleći na namaz.

Ovo su neki od ključeva koji otključavaju životna vrata, neke smjernice kako da se živi u spokojstvu, pa ih nastojte primijeniti ne biste li uspjeli na oba svijeta.

Bojte se Allaha, o vjernici, i budite svjesni Njegovog nadzora. Uzmite pouku od onih koji su bili prije vas, i znajte da ćete sigurno susresti svog Gospodara i da ćete odgovarati za sve što ste činili, bilo malo ili veliko, osim onoga što Allah oprost; a On doista mnogo prašta i milostiv je. Zato, povedite računa o svojim dušama! A pomoć je od Allaha, i nema snage niti moći osim s Allahom.”

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

